

悼吾鄉李浴日先生

盧 震

五百年來，以文人而知兵事者，明有王文成，清有曾文正，此兩公皆以文人精兵符，克平世亂，建立不朽之殊勳。先生生當亂世，獨專心鑽研兵學，數十年如一日，著述等身，爲軍事論壇所推崇，其致力闡揚中外兵學，宣傳國策，鼓吹抗戰反共，提倡兵學研究，先生之志，是亦王曾二公之志也，惜其際遇不及王曾二公，故無二公之勳業，今日竊志以歿，是不獨爲先生惜，尤爲吾國兵學前途惜也！

吾國兵學前途落後之區，先生獨能蜚聲文化

界，正喜啓導有人，今而後，其發曠振聾者何人？先生在時嘗本國父「鼓動風潮，造成時勢」之革命戰理，力主不斷反攻，逝世前夕，又欲赴金門前線搜集登陸戰資料，作具體研究，當此海峽風雲正緊之際，正喜共同籌策反攻，今竟遽逝，情何能已，是先生之死，實桑梓喪賢良，國家失棟材！

先生雖死，而先生之文言不朽，精神不死，雖死猶生，吾輩後死者當效法先生之爲人，繼續先生之遺志，達成反攻復國之任務，以慰先生之靈！